

三怡堂叢書

紫山大全集

五七

三子集

卷之三

七

紫山大全集卷十九

元 胡祇通 撰

祭文

祭伏羲氏文

四篇

仰天俯地畫卦造書德通百神情類庶物發天人之奧妙
開耳目之蒙聳百獸率馴羣生咸遂修燔炮以代血毛之
食從簡朴以服皮羽之衣聖冠百王功垂萬世敬因秋祀
式薦明禋

代天而言作民之極誠孚德覆獸伏鳥馴法乾效坤開物
成務前王無配後聖是師茲率舊章載嚴秋祀

生民之初標枝野鹿不生大聖龔瞽孰開火化既修人倫
既序有綱者政有瓘者文獸不爲灾人貴于物爲民立極
惟皇之德

神龍負圖人文斯定絡馬鼻牛以前民用燧火熟腥以濟
民病倥侗顓蒙是彝是訓穴居豕游有倫有政盛德大功
孰非元聖

祭神農文 四篇

斲耜揉耒教民務農飢而食寒而衣疾而醫病而藥五穀
盈廩百草圖經通天下之財成日中之市天縱將聖福我
後人澤流無窮禮宜通祀式因常服敬薦秋成

火瑞格天太昊齊聖五穀既藝百藥備嘗克當天心以壽
民命萬世永賴神功益彰稷黍西成敬陳嘗薦

草食而毒鮮食則艱黎民阻飢皇則食之耒耜既陳黍稷
藝之草木金石等差愈疾既飽而嬉既壽而安追本推原
惟皇之恩

襁褓耜耒教民粒食別味嘗藥人無天疾化國樂郊虎豹
遠跡居居于民朴俗一教行化成莫知刑辟火瑞火紀
萬世仰德

祭黃帝文 三篇

鑄兵除暴垂衣御宸備百物以濟民生登九天而成聖業

冕服有制禮樂用彰貽百篇蘊奧之內經開萬世無窮之
壽域恪尊祀典仰答神庥茲因西成用陳常薦

聰明既開姦僞茲起惟皇作君威以殲矢垂衣而治禮樂
亦明飽食逸居百疾交攻惟皇隱憂作爲醫經扶危而安
起死而生著書垂訓民無天札後之爲君仰茲成法

宮室車輿裳衣軒冕百物咸備以濟時變定厯作樂談醫
論道濟民仁壽旣富而教創制立法畢具無缺後聖後臣
無損無越

祭五臺山神文

某官某謹遣某致祭于五臺山神方今聖天子在上百神

受職獄瀆之外名山大川在一方者望秩禮畢守土官歲時致祭未嘗廢祀聖天子恐土人之不誠潔黍稷之非馨時遣名僧作佛事以祭國家敬恭明神匪懈匪怠惟神歆受明禋不可不垂報祐興雲霈雨潤枯蘇旱神之職也雨澤愆期年穀不登災及于民豈神之欲也至於獄冤滯而不理吏縱恣而弄法賦稅不均政治不舉冤憤充塞干犯和氣此土官之罪非民之罪也降災致罰請加諸身比歲秋旱太原一方之膏澤神實主之聖天子禱祀之誠惟神其鑒之深山大澤實生龍蛇既能生之必能役之起蟄龍飛瀚海一洗魃虐此神之賜也某等之望也尚饗

祭汶水神文

維大元歲次癸未四月乙酉朔越四日戊子某官某謹致
祭昭告于汶水之神聖天子臨御二十五年於茲矣五行
循序庶徵惟和聖筭睿思以爲水由地中行猶血脉之榮
一身大經綿絡一有滯滯則身爲之失和所以數平導決
地平天成萬世永賴夏禹以爲已任八年於外而不辭也
惟神載在經傳寔爲名水惟其開導修潔之不至障塞壅
蔽曲爲隄防不惟不盡神用而反爲民害是用命某等敬
順神德轉失爲功乘水潤下直走京師遐方異域月輪歲
貢如山如阜不復告勞神之力也伏願祈寒不能凝其行

秋潦不能鼓其勇載泛載浮有恒無替四時牲酒肥腍馨
香著之祀典與國無疆尚饗

祭泗水神文

維大元歲次癸未四月乙酉朔越四日戊子某謹致祭昭
告于泗水之神皇帝事天勤民神人咸喜六合之內名山
大川能興雲致雨者罔不望秩禋祀海濱受職川澤効靈
異域遐方通道致貢陸行山宿輪蹄困憊浮重致遠無若
水運是以按圖命官疏導穿決舟楫所通遠邇咸集惟神
源高委長徹達南服來威來庭萬里取便某等拜受庭命
開除壅蔽疏導堙淤贊神功而舒民勞達方物而饒國用

伏願旱不淺澁霖不濫溢溶溶漾漾不舍晝夜祥飈送颿
權歌奏功與國無窮廟貌血食尚饗

西冶祭金火神文

某年月日某官某謹致祭于火金之神惟神祝融正號蓐
收表功焱熾而威從革而利成熟庶物剝裁萬堅列五材
以養民分四時而成歲神功相協國用以饒方今我國家
外事兵戎內敦農桑欲成其功先利其器兵則戈矛劍戟
農則耒耜耰耬有備無虞闕一不可分命厥官大典諸治
某等董工就事備物具材有炬既明有橐斯舉謹占吉旦
敬告明神伏願炭熾而堅礦銷而利出埽江河之決積金

山岳之高恪導藝儀式陳明薦尚饗

皇城啟土地神文

奠安神鼎已成萬雉之崇墉拱衛皇居宜亘重圍之禁宇
土功率舉坤靈實司再獻明禋用符卜吉導自周之宅洛
肆于郊以用牲雖楨幹畚鍤之暫勞庶外內闕廷之咸備
邦基永固神庥是扶

太原祈雨文

守土之吏失德致旱乾之爲灾力田之氓何辜憂凶荒之
無歲自春踰夏不雨愆期雲氣合而復離風聲烈而肆虐
百穀將槁六陽益驕民心怨咨物價騰湧茲蓋某等曠承

流宣化之任多傷和致異之愆或恩澤之不流或獄訟之
冤滯或姦吏弄公法或豪族侵細民循省厥躬實繁有罪
引咎何幸負責莫逃然而殃無辜之民宥有罪之吏情實
不忍禍懼彌深輒罄愚誠仰干慈造幸賜甘澍之霑被誓
當悔過以自新

彰德路祈雨文

闕潤民之實惠怨語升聞忤造物之致和亢陽示譴貪汙
失德黎庶何辜黍稷吐穗而中乾麻豆成陰而半槁工商
憂穀價之增貴田野懼歲凶之死飢小大焦勞賢愚愁嘆
某等任守土之切責先祈年之隱憂悔罪懷慙痛心疾首

仰干慈造屈賜哀矜勅名山而詔大川起癡龍而誅旱魃
曷勝慶幸無任恐惶

祭杜元伯文

菌耳無日螻蛄無年人莫之恤各盡其天長松千尺可駕
萬椽源泉混混可別萬川天閼淤塞拔本塞源生也何厚
廢也何偏天生蒸民哀哀同類愚蒙驚庸萬不一慧白玉
樓成鵬鳥投墜與也何難奪也何易嗟嗟元伯百未一施
玉冠而溫山立而儀童稚讀書警民不疑一日千里迅不
可追弄筆措辭汪洋陸離先覺有言杜氏有子過庭之訓
日詩曰禮業之後先學有源委業日益廣行日益成洗眼

一飛傾耳一鳴一入京師四海知名孰謂一疾奄忽泉扃
嗚呼造物各相乘除富貴壽考多歸愚魯才名一鍾命則
不腴此何不足彼何有餘誰司權衡校錙量銖父兮爾思
母兮爾哀過君之門愴余之懷人之有死如旦之暮死而
無憾而謂之數獨於吾友怨激無訴有淚何窮一瀉君墓
嗚呼哀哉尚饗

祭趙繼先墓文

某年月日某謹以清酌之奠祭于亡友繼先之墓君始自
魏來相扶老携幼謁我先人先人指君呼余而言曰斯人
也陵川趙會元公定先生之子也母氏李河中李金吾之

孫欽止欽叔之妹欽若欽用之姊也爾祖治解欽止爲縣
屬公定爲門客姻好締交爾祖實成之也三世通家親若
同姓宜善交之故繼先稱我先人以舅不肖於君之母敬
以姑禮拜之子姪輩歲時伏臘往來慶賀自時厥后僦舍
同里氣相噓沫相濡若此者將十年吾友以世爲西人還
家之念日往來於心不肖輩懇不能留奉母氏挈妻子復
歸故鄉後三紀以西州地僻土瘠生理艱苦舉家復東來
行李囊橐敝廢無幾所可喜者母壽而康子孝而壯不肖
一二友人謀曰繼先純誠仁厚執守有餘而變通不足蹉
跲蹉跲窮乏困苦我輩不得不任其責且善人信人人不

知恤天必祐之茲議未寒而不肖應召東方私自喜曰拔
茅連茹一二友舊亦庶幾脫窮苦矣如繼先者又窮苦之
甚者也至則當立引之時異事異齟齬梗塞願莫之遂繼
而聞吾友有喪偶之憂驚悼感嗟念君之老母在堂子女
未婚嫁家四壁而中饋乏主計何以爲懷也今未踰月吾
友亦謝世嗚呼天乎報施善人誰其司之如無有司之者
吾之哀鳴伸訴則亦已矣如其有之則生殺禍福之理何
乖謬若是哉不然推窮斯人致疾之由取怨之故意無得
而言乎嗚呼天地鬼神不可以忿激怨咎善人不壽求之
人爲則又無所愧憾焉然則哭友之哀何時而已耶霜風

一肅千草萬木適足收藏之氣充然而誠實者幸也或花
或蕾方向生榮隨時而枯落者不幸也然則生殺之於草
木亦欲以善惡求之哉嗚呼吾友阨窮而死沉沉九原當
自安之人之取友生不分財惠以相周死不知恤其家非
友也問而老母撫而諸孤義也吾友之疾不得相扶持吾
友之亡不得相付託雖然在不肖輩敢忘于心哉神靈其
鑒之嗚呼哀哉尚饗

祭王中丞子勉文

我年十七君冠而婚君來自東識我先人命我以兄事君
如神我於是時總角未巾雖曰爲學罔有見聞觀君落筆